

## **PN Aprova Pedido Levantamentu Fundu Petrolíferu Daruak Iha Diskusaun Jeneralidade**

**DILI, 22 juñu (TATOLI)** – Parlamentu Nasionál (PN) aprova ona pedido levantamentu estraordinária husi Fundu Petrolíferu daruak ho montante millaun \$286,8, iha diskusaun jeneralidade ho rezultadu votasaun a-favór 41, kontra o no abstesau 19.

Proposta ne'ebé submete husi Governu maka lei número 17/V (2) kona-ba realizasaun ba tranferénsia estraordinária Fundu Petrolíferu daruak durante tinan 2020 no alterasaun dahuluk ba lei número 2/2020, lora 6 abril.

“Ho nune'e, proposta lei número 17/V (2) pasa iha jeneralidade,” tenik Prezidente Parlamentu Nasionál (PPN), Aniceto Guterres, hafoin anúnsia rezultadu votasaun iha sala plenáriu PN, segunda ne'e.

Tuir PPN, sei iha proposta tolu husi deputadu sira atu debate tan iha diskusaun espesialidade.

Prezidente Komisaun C, ne'ebé trata asuntu Finansa Públika, Maria Angélica Rangel, informa husi orsamentu millaun \$286,8, atu reforsa kofre Estadu finánsia servisu administrasaun públika ho montante millaun \$168,8 no antesipa despeza hasoru COVID-19 inklui rekuperasaun atividade ekonómika ho alokasaun millaun \$100 ba Fundu COVID-19 to'o Orsamentu Jerál Estadu (OJE) 2020 vigora.

“Rekomenda atu labele halo impréstimu ba orsamentu seguransa sosiál, ba apoia ekonómiku no subsidiu. Presiza urjente pagamentu ba subsidiu uma-kain iha Oé-cusse ne'ebé sei pendente hela,” dehan atuál Deputada Bankada Governu Fretilín ne'e.

Nune'e mós, Deputadu Bankada Governu PLP, Abel Pires, argumenta razaun a-favór ba proposta Governu ne'e tanba konsidera pedido levantamentu ba Fundu Petrolíferu ne'e pertinente atubele reforsa kaixa Estadu no aloka tan ba Fundu COVID-19.

Deputada Bankada Opozisaun CNRT, Virgínia Ana Belo, fó apoia ba pedido Governu ne'e maibé husi ezeutivu sira presiza halo jestaun di'ak, liuliu ba Fundu COVID-19 hodi labele iha diskriminasaun ba benefisiáriu sira no apoia ekonómiku.

Opiniaun hanesan maihusi Deputada Bankada Opozisaun UDT/FM, Isabel Maria Freitas Ximenes, konsidera levantamentu estraordinária ne'e pertinente, maski nia parte sei iha dúvida oituan iha alokasaun orsamentu.

“Ha'u la kestiona Governu hato'o levantamentu Fundu Petrolíferu tanba presiza reforsa tezouru Estadu hodi financia mákina Estadu, maibé iha dúvida oituan iha alokasaun ba Fundu COVID-19 tanba balun seidauk ezejuta,” nia akresenta.

Tuir agenda, diskusaun iha faze espesialidade no finál globá sei kontinua aban iha sala plenáriu.

Antes ne'e, iha lora 2 abril PN aprova pedido levantamentu Governu no iha lora 6 abril Prezidente Repúblika, Francisco Guterres 'Lú Olo' promulga ona Dekretu Parlamentu Nasionál número 14/V, kona-ba autorizasaun ba realizasaun tranferénsia estraordinária husi Fundu Petrolíferu ho montante millaun \$ 250.

Husi totál orsamentu millaun \$250 ne'ebé aprova, millaun \$150 aloka ba finansiamentu medida prevensaun no kombate moras COVID-19 iha ámbitu Fundu COVID-19, millaun \$100 ba konta jerál tezouru no husi millaun \$150 ne'e, aloka \$500.000 ba PN atu dezenvolve polítika no programa iha ámbitu prevensaun no kombate surtu COVID-19.

**Jornalista: Florêncio Miranda Ximenes**

**Editora: Julia Chatarina**

## **PN Autoriza Transferéncia Estraordinária Daruak Husi Fundu Petrolíferu Millaun \$286,8**

**DILI, 23 junu 2020 (TATOLI)** – Parlamentu Nasionál (PN) aprova ona iha pedidu autorizasaun Governu ba transferéncia estraordinária daruak husi Fundu Petrolíferu ho montante millaun \$286,8.

Pedidu husi Governu ne'e pasa iha diskusaun finál globál rezultadu votasaun a-favór 43, kontra o no abtesaun 18.

“Proposta lei número 17/V 2 aprova,” deklara Prezidente Parlamentu Nasionál (PPN), Aniceto Guterres, iha sala plenáriu PN, kinta ne'e.

PPN fó sai katak aban Komisaun C ne'ebé trata asuntu Finansa Públika sei finaliza redasaun finál hafoin manda ba Prezidente Repúblika hodi halo promulgasaun.

Nia dehan, tuir lei Xefe Estadu iha tempu atu analiza durante loraun 30, maibé ida-ne'e kabe ba Prezidente Repúblika nia kompeténsia.

Iha Proposta orijinal husi Ministériu Finansa, VIII Governu Konstitusionál husu millaun \$400 inklui proposta adisionál maibé PN autoriza de'it millaun \$286,8

Hosi millaun \$286,8 ne'e aloka millaun \$216,8 ba reforsa kofre Estadu hodi finánsia servisu administrasaun públika no millaun \$70 antesipa despeza hasoru COVID- 19 inklui rekuperasaun atividade ekonómika.

Prezidente Komisaun C, Maria Angélica Rangel husu ba membru Komisaun C no Ministériu Finansa atu partisipa ativu iha redasaun finál, molok lori ba Xefe Estadu.

Deputada Bankada CNRT, Maria Fernanda Lay, argumenta nia parte vota abtesaun tanba Governu la hatudu dokumentu ba ezekusaun Fundu COVID-19.

“Ha'u hein Governu bele ezekuta ho di'ak no hatudu relatóriu ezekusaun,” tenik Deputada Bankada Opozisaun ne'e.

Deputadu Bankada CNRT, Domigos Coelo husu ba Governu atubele uza osan ne'e hodi selu ema sira ne'ebé servisu iha liña frente.

Enkuantu, Vise Prezidente Bankada CNRT Patrocínio Fernandes, fundamenta razaun nia fó votu abtasaun tanba esplikasaun husi Governu kona-ba ezekusaun Fundu Petrolíferu dahuluk ladún klaru no laiha relatóriu.

Sorin seluk, Deputadu Bankada KHUNTO, Luís Roberto, konsidera nia parte tenke a-favór ba proposta Governu tanba iha nesiedade duni atu Governu foti osan hodi reforsa kaixa tezouru no Fundu COVID-19.

“Bankada KHUNTO hakarak fumsionamentu mákina Estadu kontinua la'o maibé husu ba Governua atu ezekuta ho di'ak atu povu ida-ne'e bele hetan benefísiu,” nia subliña.

**Jornalista: Florêncio Miranda Ximenes Editora: Julia Chatarina**